

# Greiflet 2013 in Brunnen

Plöder zwüschet em Ratsherr Erwin vo Brunne  
und em Willy vo Schränggige

---

- E** Guetenabig midenand, hür simmer jetz nu einisch cho, da uf Brunne abe Z'nächscht Jahr chönnd ier das Plöder mideme Äpp im Ei-Fon abelade. E so gahts hüttigstags: e fertige Blödsinn wome eigentlich verbiete sett D'Streicheleinheite passierid jetz überall, nur nid deheime im Bett.
- W** Ja, es gid sogar Äpps, ☹ wo eim diräkt tönd zum nächschte WC führe Das isch vor allem für dertig guet, ☹ wo Problem hend midem Abführe. Es gid au settigi, wo eim bim Sueche ☹ vomene Gspuusi z'Hilf chämid Die beschte sind aber die, ☹ wo eim z'Chindli mache au grad abnämid.
- E** Die hüttig Technik fahd ja afig überall scho im Chindsalter aa Gsehnd ier hüt e Gof am Tisch, wo anstatt game, d'Suppe ässe cha? A der Ingebohler Chibli gits bi de Jungwächtler defür gar nüd z'ässe Weder Brot nu Schnitzel sind ume gsii, me hed die eifach vergässe.
- W** De Meiri hed im Büro plagiert, ☹ sii Frau siig wiene lüchtende Stärn Ja, er wett säge er heig sys Amadiesli ☹ e so richtig zum Frässe gärn. Da meint de Franz hämisch: ☹ bi dier isch sicher öppis falsch gloffe, Wenn sie chönntisch trinke, ☹ hättsch si du öppe scho lang gsoffe.
- E** D'Alice isch mid es paar Kolleginne verreist uf Gran Canaria De Louis, hed si tänkt, muess doch au eisch sii Rueh, sy Fryheit ha. Aber der hed sich leider gar nüd chönne erhole und usspanne I de Garasch stahd e Goffere, d'Adrässi vo der Alice draaghange. My Frau hed z'ganz Gepäck vergässe, hed är a de halbe Wält verzellt Debii hedem de Köbel e alti, lääri Goffere i d'Garasch abe gstellt.
- W** A dene vier Brunnerfraue ☹ isch es scho viel schlimmer ergange Es schlimms Ändi vonere Seefahrt, ☹ debii hets ganz guet aagfange. Wäg dem Idiot hend si schwimmend ☹ z'eigeti Läbe rette müesse Ich meine, das Quartett darf me hüt ☹ nu als Heldinne begrüesse.

- E Der Otti hed ufere grosse Chrüzfahrt au scho nid äbe guet usgseh  
 Drum hed är sich entschlosse, mier längid jetz Fahrte i Urnersee.  
 Mit em Ramon, dem bekannte Wältebummler, isch er i See gstoche  
 I de Tällsplatte die Fahrt aber für n'es Bierli zwei underbroche.  
 Bim Iistige isch de aber meine irgend öppis zimli schief gloffe  
 Bed sind i See use trolet und wärid liiberemänt nu glii versoffe.
- W** I de Wylerbrügg usse ⚡ wird de Muotadamm umene Meter erhöht.  
 Da wird traxnet und Stei ufbige, ⚡ zur Sicherheit, wie sich's ghört.  
 Trotz Uwätterwarnig hends de Bagger ⚡ i de Muota unne la stah  
 Nur mit Glück hets die schwär Maschine ⚡ nid fortgschwämmt gha.
- E En ältere Herr isch für sich und sii Frau e Schiffsreis ga bueche  
 Hend si gärn en Ussekabine mit Doppelbett, si chönnd ussueche.  
 Nei, separati Bett liebt my Frau, das hed ganz e spezielle Pfiff  
 Wüssid si was, meint der Maa, nämemer doch es separats Schiff.
- W** Du Schatz, wemmer nid einisch ⚡ en guete DVD-Player chaufe,  
 Weisch de chönnt me doch äntlich ⚡ de Hochsigfilm la laufe.  
 De Beat bringt uf Bstellig eine, ⚡ tued ne au grad installiere  
 Ier hättid da zwar scho eine, ⚡ hend er der nid welle usprobiere?
- E Ja, für vieli isch die hüttig Übermittligstechnik scho zum vergässe!  
 Mittels SMS fragt z'Mami: Sandro chusch du hei zum Mittagässe?  
 Doch am Mittag isch es ganzes Dotzet vorem Huus usse gstande  
 Wäge falscher Bedienig tued das SMS bi 30 Empfänger lande.
- W** De Werni cha sich wäg de Handy-Instruktion ⚡ gar nüd beklage,  
 Sy Frau schaffet äbe z'Schwyz obe ⚡ imene sone Telifon-Lade.  
 Und doch hed sys nüü Natel ⚡ ums verrode nümme welle gah.  
 Kunststück, er hets äbe ⚡ mitsamt de Sunntigshose gwösched gha.
- E D'Hodärassler hend sich nacheme Uftritt ufe Heiwäg gmacht  
 Dass all ygstige sind, da defür gid der Ivan bsunders guet acht.  
 All sind awäsend gsii, nur eine hetts nid richtig möge lehre  
 Genau wägem Ivan hed de Bus nu einisch müsse umchehre.
- W** Au d'Urmibärger-Chilbi cha gfährlich sii, ⚡ han ich ghört säge  
 Eine hed z'Veloschloss nid ufbrunge, ⚡ isch schier am Bode gläge.  
 Es paar hend zuegluegt und glachet, ⚡ die uverschämte chöge  
 Es sind Schönebüechler gsii, ⚡ das hed am Tschege nid abemöge.

- E** A de Ingebohler-Chilbi hets au Bare mit Tangobelüchtig  
Eine hed der Usgang nid gfunde, hed halt trunke, tüchtig.  
Bim dritte Alauf isch es am Personal de äntlich glunge  
Me hed de Stefan heil und ganz a die frisch Luft brunge.
- W** Es isch schön, weme eim hilft ☺ wo der Usgang nümme gfindt,  
I de Chliischi isch es anderscht gange, ☺ und de nu gschwind.  
Ei Gascht hed randaliert, ☺ hed si komplett dernäbe ufgfuehrt  
D’Nadja hed churz gmacht, ☺ hed de Sürmel zur Beiz usegruehrt.
- E** D’Helga isch für 6 Monet uf Ägypte greist, ja nid nur schnäll  
Kari, Du luegsch mer de guet zum Hundäli, passisch uf, gäll!  
Doch d’Frau isch nach es paar Täg wider im Flugzüg gsässe  
De Hund hed langi Zyt gha und überhaupt nümeh gfrässe.
- W** Hüt vor 51 Jahre hed me im Blettli ☺ folgende Färs chönne läse  
Es isch au hüt wider aktuell, ☺ aber leider doch en alte Bäse:  
„D’Brunner wend schiints ☺ e Luftseilbahn i d’Fronalp ufe buä,  
Aber z’Schwyz obe wends nüd, ☺ die sind si de nu einisch gruä.  
Si tüend sich gäge uswärtig Aktionäre ☺ e so wehemänt wehre  
Mier Brunner dänkid dra, ☺ tönd wider einisch de Gegel chehre.“
- E** Das mid de nüue Stoosbahn isch doch en eländ leidigi Gschicht  
Geil und steiler, au d’Choschte fallid steil usem Glichgwicht.  
De Horärank-Tunnel hed nid müesse ane, werum nur bloss?  
Jä nu, defür fahrt de einisch d’Bahn im Tunnel inne ufe Stoos.
- W** Au um d’Rothe flueh-Bahn wird gstritte, ☺ wie ums Kaisers Bart  
Bringits d’Schwyzer ächt ane, ☺ das die nu vor de Stoosbahn fahrt?  
Mier Brunner hend halt d’Timpelbahn, ☺ jä, es gahd öppis det obe  
Ja, und die letscht Fahrt siig nü, ☺ hindere, uf die Sibni verschobe!
- E** Vo dr Ingebohler- und dr Urmibärger-Chilbi hemmers scho gha  
Jetzt chunnd halt nu die letscht, d’Schönebüecheler-Chilbi dra.  
Zwei unzertrennliche Freunde sind au z’Schönebuech iigfahre,  
Der eint isch anstatt hei diräkt uf Schwyz is Spital uf de Bahre.  
Der ander hed wägeme Sturz es riisigs blaus Aug heitreid!  
Er hed drufabe e ganzi Wuche lang e dunkli Brülle aagleid.
- W** E tiefgfrorni Pizza ☺ isch de nid nur für fuuli Fraue öppis, ☺ nänei  
Au bekannti Chöch ☺ nämid öppe einisch ☺ e sone Superflade hei.  
Trotz langer Bachzyt ☺ hed am Peter siini ☺ e kä schöni Farb gha  
Er hed si äbe us Versehe ☺ zunderobsi i heiss Bachofe ine ta.

- E A de Schwyzerstrass hets eine, wo d'Chuchi im Griff hed  
Problem gits nur, wenn är für ne Gascht es Kafe uselah sett.  
Aber wäg dem muess en abbrüchte Husmaa ja nur lache,  
Er holt eifach de Köbel dänne und lahd der la Kafe mache.
- W Im Dezämber hets einisch ☹ es Mäsäli Schnee anegrüeht  
Jetzt isch das öppis ☹ wo sofort zu Staus und Unfäll fühert.  
Mier sind üs das doch gwönnt, ☹ ich verstah das eifach nid  
Oder sind de d'Schwiizer Autofahrer ☹ wirklich e so blöd?
- E De Gripen-Ueli hends ehrevoll zum Bundespresi gwählt  
D'Freud a Usslandreise isch zwar öppis, wo ihm e chli fählt  
Ich würd de Schnori Tschümperli als Dolmätcher mitnäh  
Die zwee würdid doch sicher es schnusigs Reisepärli gäh.
- W Im Dezämber hätt doch ☹ de Wältundergang sölle stattfinde  
D'Mayas nämids ärnscht, ☹ hend üs nid e Bär welle ufbinde.  
Ja, weme dänkt, was da ☹ a de Klimakomferänz use cho isch  
De hemmer scho der Afang ☹ vom Wältundergang ufem Tisch
- E Me muess si scho afig frage, wie's um üsi guet Wält stahd  
Weme nur dänkt was da z'Syrie und z'Ägypte äne abgahd.  
Truurig, dass e Milliarde Mänsche kä subers Wasser hed  
De schlau Kassasturz fragt, ob me üses ächt nu drinke sett.
- W Dänkemer dra: ☹ Es kommt die Zeit ☹ wo die Jugend entflieht,  
Und sich die Röte der Wangen ☹ der Nase zu zieht!  
Tatsach isch: ☹ Es isch es Gschänk ☹ weme darf älter wärde  
De muess me geduldig akzeptiere ☹ gwüssni Beschwärde.
- E Mier hoffid, ier alli wärdit's hür schön und gmüetlich ha  
D'Greifler sind imene Jahr sicher wider mideme Plöder da.

---

## Greiflertanz

Anschliessend an das Plöder findet im **Restaurant Stauffacher**  
der Greiflertanz statt.

Ab 21.00 Uhr Musik und tolle Greiflerstimmung **mit Rampass**

Auf zahlreichen Besuch freuen sich die Musikanten, die Wirtsleute  
und die Greiflervereinigung Ingenbohl-Brunnen